

四庫全書

集部

欽定四庫全書

蒙齋集卷十六

宋 袁甫 撰

箴

以厚箴贈鄭肖翁

厚天賦薄人作孰以之已力學毋外彊而中弱先樸素
後丹腹故曰禮于人猶酒蘖君子厚小人薄聽之哉是
心皜皜本純白秋陽暴之江漢濯何用智巧強穿鑿

立志箴

為學如射立志為先志在命中鐵石可穿企彼聖哲萬夫莫前有志竟成古語信然

奉行蠲租詔書民有言吏弗虔者箴以誨之

江東土瘠荐饑無食天子曰咨為我心惻田租亟蠲其仁如天十捐其半況也全捐窈窕深谷有詔未識吏愚爾民負租猶督民實不愚吏乃自誣澤壅弗流民病曷蘇民詞良苦吏勿瞋怒昭哉此心上帝臨汝

愧箴示清夷弟

易言心亨書言心休浩浩融融熙熙愉愉吾何愧乎哉
然人苦不自知虛食天地間粟焉可不知愧伊尹聖人
后不堯舜愧若撻市矧常人乎余坐山中自省知過愧
集心胸請略陳其槩天資正直急義勇為先君子講說
諸經抄錄傳後炳然有耀吾愧先長兄博學精識克紹
前聞居考妣喪各茹素終三年仕而見黜屹無附麗吾
愧今次兄此平生之愧也而他過更多晝則閒暇夜則

情肆暑則袒裼意闊而多漏才疎而欲速言輕而易忤
檢點此身恐愧不止此詩云有卷者阿飄風自南虛而
能受之謂也余虛心以竚罔敢自是人稱清夷不事諂
語勤箴吾愧是所望也

觀省箴贈桂伯順

過何從生不觀省故提起精神靡間朝暮精神者何靈
明天賦惟是觀省弗得弗措一日得之本來素具不以
力索無物可付徹上徹下綽乎有裕

敬止箴為張伯常作

古聖有訓人心惟危所貴安止夙夜自祇因止而敬差
之毫釐敬其所止猶為遠而曰止曰敬本不相離吾止
在斯而敬在斯思為不作寂無所知豈曰無思豈曰無
為思以無思為以無為屋漏暗室上帝鑒之欽哉欽哉
慎勿自欺

懲忿箴

忿從何起反觀諸已寂然本無何怒何喜波浪平息湛

若止水懲忿之要如斯而已

忿似乎剛而非真剛真剛光明忿自然懲心本無忿因物乃形剛德在我不懲之懲

室欲箴贈留靜翁

欲從何生一念之萌凝神靜觀勿與欲爭雲翳既散日月自明室欲之要不動亭亭

曷為有欲剛德不足真剛不屈欲自然室

剛本心也天德也人人固有何勞外假

忽然猛省欲從何起不室之室在我而已

士箴

士如之何自賤自貴訊之靈龜昭茲涇渭謂爾鳳兮胡
輟而喜媿彼鶚兮曷云其惠爾荃爾蘭疇不服媚匪資
伊施曷遐有棄黃中則通純白則賁爾寶在躬貴哉斯
士天之牖之取攜孔易歌以玉汝毋委厥美

後生可畏箴

并序

或問曰聖人曰後生可畏何謂也吾應之曰子知夫人

之生乎曰知之子知夫生之倍數乎曰未解也吾語汝夫七十二百日較之一日則為七千一百九十九倍其相去可謂遼絕甚矣吾以為七千一百九十九倍可斂而僅為一倍問者駭曰談何容易吾曉之曰再積七千二百日我所歷之日如是彼所歷之日亦如是彼我對觀則我加于彼非僅一倍乎吾復語之曰子以一倍為少乎不知積而久之其少也不足以倍問者益駭吾曉之曰又積七千二百日我所歷之日如是彼所歷之日亦

如是彼我對觀我得其三而彼得其二我何足以倍彼
又積之則我四而彼三又積之則我五而彼四我于是
歲盈百矣又積之則我六而彼五于是歲過百矣嗚呼
始也以一日而較其為倍也七千一百九十九已而我
視彼僅倍又已而不及倍又已而五四焉六五焉久之
而歲俱盈百焉回視七千一百九十九之倍于一日也
果如何耶問者若有遺失吾曰子勿異也請為子述後
生可畏箴其詞曰

我孳孳汲汲兮遡萬里之脩程懼後來之見迫兮揚余
鞭未嘗暫停使我而微怠微息兮其迫愈不皇寧矧夫
我怠而彼奮我息而彼興將不止迫我又將陵駕我兮
而莫之與京我瞠乎其後兮彼將摩青雲而上征嗚
呼勿謂彼脆乃敵之勅光陰何迅中夜以驚忽然深省
如醉得醒老而知畏何異後生本無老少日光月明萬
古一息無虧無成何以用力業業兢兢

銘

鉛山縣石梁銘

鉛之山兮蒼蒼鉛之水兮泱泱
劖山骨兮為梁臥洪波
兮康莊題巨扁兮彌章萬目具瞻兮萬古之光

竹坡銘贈饒生

竹兮中虛而節不改是謂剛
中心為之宰虛則能應剛
則不屈雪霜摧之葱葱鬱鬱
竹乎竹乎與吾心通坐對
蕭然不記春冬

江東憲司又新亭銘

新植花竹生意津津雖則尋丈四時皆春新更軒牕和
氣熏熏纔可容膝淨几無塵又新命名豈是之云勇于
進德用力于仁日改月化通體精神外觀物妙內驗吾
身客來遠方問余又新不知所對何新何陳

達源齋銘

泉始達流涓涓泉有自道孰先滿宇宙無非源日用間
井井然問禮樂吾何言

穀水柯山之勝聞天下作知樂仁壽二銘

動無非妙試觀諸水日夜周流莫見終始此不可見寂然而已知者何樂蓋樂乎是

右知樂銘

瞻彼山矣形若塊然振古青青發育無邊靜乃如此妙不可傳仁者默識以永天年

右仁壽銘

彝訓堂銘

大哉彝乎天地之先人處彝倫日用粲然是為大訓倚

衡參前彝則不變易則易遷是遷不遷乾元坤元元即
彝訓發育無邊乾坤不言皇極敷言言何所言極即坤
乾

自得堂銘

自得之訓昉于帝堯子思孟子陳義愈昭得何所得匪
深匪高洞然太空大無不包萬物皆備不增秋毫無喪
無得得之靡勞此學不傳嗟哉握苗師友講明樂也陶
陶

徐錄參求座右銘

人命至重上帝臨之德貴好生察辭于疑如得其情胡
可喜而本心靈明慎勿自欺

默識銘贈饒生

子之從師亦既努力識云多矣然匪默識默識如何誦
詩讀書此讀此誦與世人殊人皆不然而我樂此大道
坦坦君臣父子是中何言是中可言終日默默有不默
存

立志銘

志不可奪可奪非志聖人與我厥本無二一朝內省發
大羞愧此志既立對越天地

勵志銘贈朱冠之

維古之人蚤夜憤悱維今之人甘心委靡頑痺不仁偷
安無恥至其極也醉生夢死胡不反思道只在邇欲藥
痼疾勵志而已志果自勵其勇無比當為即為有何疑
似我德我崇我義我徙如盲還明如痿復起敢以斯銘

用告志士

尚志銘

志不可奪可奪非志厥志惟何大道無二我志聖同清
明精粹不自尊尚乃甘暴棄君子尚之發大羞愧不矜
闕觀不枯小器善必亟為惡必亟避手持足履耳聽目
視貫通昭融範圍天地所志在此朝夕從事蔽以一言
居仁由義

五常銘 并序

仁義禮智信曰五常乾四德配四時五行無土五常無
信非無也行其間也四時五行常還相為本舉一猶可
況四乎作五常銘

仁

仁即人尊無倫是為元天德純純乃生萬物春春何在
在天君剝初復復下仁仁指初妙乾坤動靜具人我均
非二本親吾親

義

義方外外即內羞惡心從何至本正直無偏陂利欲中
生死際差毫釐終身恥健乃決剛能制精入神一無二
忠事君事上帝

禮

禮之實本太一洋洋乎貫三極邃古初自質樸後聖作
從其朔是本心清且直曲亦禮皆天秩品節明愛敬立
禮乎禮無放逸

知

知非見無不見見在物為物眩不格物失對面物皆我一以貫達天常常適變變即常疑斯泮無知也知自徧誠如神著龜見

信

信是主四德聚非繩約何其固嗟面朋子與汝因物遷棄弗顧惟誠身戒妄語語而信孰予侮默已孚神是與天何言四時序

五事銘

并序

貌言視聽思曰五事孔子告顏子視聽言動非不及思在其中也九思一章可見矣思為四事本五事亦還相為本作五事銘

貌

貌曰恭君子容瞻視尊衣冠中匪色厲內美充足恭者貌似同載偽拙滅德凶人肖貌天地通玉溫溫春融融恭而安乃聖功

言

言有好言有莠口溺人招悔咎言曰從匪從口接以道
發不苟滿天下垂永久多言吝中是守雷風行萬竅吼
雷風息一何有

視

視何蔽月之翳翳不去月不麗目本明視為累可去乎
非翳比翳外来視匪外外亦視何外内自神明自靜止
止乎禮非勿視

聽

聽是非耳司之聲自物來無時耳亦物物交迷忽深省
聽者誰心太空物不遺孰為物吾何知虛能受聰在茲
兢兢乎道心微

思

思無數深莫測雖莫測有限闕不出位介如石鏡中象
應無迹心在思妙天則鬼神通精之極是曰睿入聖域
易無思思亦易

易有太極銘并序

太極者何本不容言既不容言曷名太極極訓為中中無不包極亦訓盡盡無所盡又加以太字何也不可得而形容擬議也太極非空空即不空太極至實至實而通未開闢前冥冥濛濛一氣既判昭昭融融昭昭即冥冥融融即濛濛此易之有也何有于易哉何有于易是故能有執有求易乃無易矣不執有則奈何曰生處觀之生兩儀生四象生八卦大哉生乎生生之謂易生生之謂兩儀生生之謂四象生生之謂八卦生生之謂萬

物生生之謂中無不包生生之謂盡無所盡可執有哉
何所不有哉此非實哉此非通哉此非即空不空哉此
非冥冥濛濛昭昭融融哉名曰易有易不自有人人有
易人人有太極不在乎紙上之易亦不離乎紙上之易
銘曰
妙矣太極易何以有于生處觀天長地久生生不窮春
夏秋冬彼云無極何勞深闢我有幾何斯昭昭之多

乾坤易之門銘并序

闔戶謂之坤闔戶謂之乾闔闢一陰陽也陰陽一門戶也非門戶則無以見易滿宇宙間莫非陰陽莫非闔闢日昃晝月昃夜闔闢也春而生秋而殺闔闢也其在人也開目見明瞑目見暗噓而息出吸而息入闔闢也其在物也舒而為華斂而為實飛走而鳴蟄藏而息闔闢也皆易也或曰易者變易之謂然則不易之義奈何曰千變萬化孰為變化是變化者即非變化是故易之中有不易者存易即不易不易即易吾何知乎易吾又何

知乎不易之易銘曰

日月為易為乾為坤乾陽坤陰是易之門一闔一闔闔
闔皆易于此乎入于此乎出出入有二乎一亦本來無

中庸銘

滿宇宙間中庸化生端的不差日用普平莫見莫顯無
臭無聲是謂天命守以一誠

贊

先師鄒國公贊

顏子如愚不以言宣賴有先師琅琅七篇夫何末章歷敘古昔之聖賢見而知聞而知者其所知卒不容言然先師雖不言而其不可隱者太空澄明而日月高懸人謂先師之好辯某也獲傳其所不傳由仁義行大舜之天始終條理夫子之全此先師所以高出諸子之上者蓋其道不倚于一偏願學孔子千古歸然

四賢堂贊

即心是道勿助勿忘愛親敬長易簡平常煌煌昭揭神

用無方再拜象山萬古芬芳

道若大路曲折萬端辨析毫釐用力甚難上續伊洛昭哉可觀考亭遺規世世不刊

偉歟東萊氣象春融相門事業元祐申公益閔以大問學磨礱其學伊何萬折必東

復齋之德碩大以寬其儀如鳳其臭如蘭弟兄琢磨惟義所安比意寂寥令我心酸


某既贊四先生之盛德矣復有謏聞願畢其說以與

同志共之世謂鵞湖之集諸老先生論議未能悉同以是妄加揣摩其失遠矣夫子嘗云君子和而不同乃所以為和不蘄于合乃所以為一致也天生英賢扶植斯道忠君愛親敬長一性靈明與天地並亘萬古不可磨滅者或入之也漸或為之也勇勇非無漸而漸非不勇也顧其所由之門然耳鵞湖之集誰得而議其異哉君子講學既切之又磋之既琢之又磨之反覆辨明惟求一是若慮其不相合心非而

口然之此乃淺丈夫之所為耳何足以窺諸老先生之門牆耶

真西山贊

謂為和耶剛正之節光明不磨謂為介耶慈惠之政載諸咏歌謂為虛耶萬卷蟠胸武庫之多謂為實耶靈襟洞然古井無波匪實匪虛匪介匪和高臥西山如蒼生何



蒙齋集卷十六

欽定四庫全書

集部
蒙齋集卷十七

詳校官庶吉士臣瑚圖禮

主事臣呂雲棟覆勘

總校官編修銜臣朱鈐

校對官待詔臣胡士震

謄錄監生臣陳栻

欽定四庫全書

蒙齋集卷十七

宋 袁甫 撰

祭文

三衢祭清獻趙公祝文

凡守茲土歲拜祠宇予未施敬人仰標梨廬墓勞止孝
弟旌里立朝抗論鐵面御史帥蜀言歸琴鶴自隨豈伊
求名忠誠匪欺洎秉政機新法力排年未七十退老高

齋世俗茫茫慾焉得剛偉歟我公玉潔日光我希高躅
惟日不足矧是後人可貽我辱我修泮水延公孫子漸
之摩之風流是似春風融融淑氣沖沖吉蠲蘋藻敬告
我公我公精神千載常新想聞斯言心兮欣欣

自鳴山廟祈晴祝文

於赫神靈天地同大有禱必應下民依賴季夏霖潦辦
香端拜俄頃之間天日開霽邦人僉言精神默契夫何
旬浹雨復為沴城閭居民匪舟莫濟莽為平川厥苗不

細大田多稼垂成欲壞雨聲稍歇民猶少慰一聞簷溜
憂窘無奈吏之不德獲罪上帝致此譴怒民則何罪痛
心疾首曷救斯敗惟依明神一誠昭對陰氛盡掃霖霖
勿再積水歸壑室廬無害農保有秋菴觀銓艾無聊之
情一朝舒泰歸功有自實神之賜祖廟離宮鳩工靡怠
匪伊為報民心攸繫神鑒斯言出由肝肺

自鳴山廟告修造祝文

惟神孝誠上通于天傳之萬古孝德章矣饒州行祠民

倚為命而門廡卑湫未稱王祀至者嫌焉某將指此來
水旱盜賊必禱必應則嚴廟貌以報神休以益顯夫出
雲雨禦菑患之靈以宏庇乎此邦之人庸敢後乎夫得
人之歡心以事神亦所以助神廣孝于天下也將以吉
日乙亥撤門廡而更新焉人心載喜神其聽之

自鳴山祖殿修造祝文

於赫神靈廟食百世庇此下民天覆地載我行其野禾
麥茂遂父老頂禮拜王大賜王之至仁厥有根柢孰為

之根篤孝于親維此孝心通天地人視彼有生與吾親
均王推此孝發育如春廟貌孔嚴安可弗新吏失其職
頽垣敗壁某拜祠下心焉跼蹐撤而新之宜尸此責安
王之靈為民祈福昭示仁孝永永無極

江東謁諸廟祝文

國之所恃者民民之所恃者神事神治民吏之職也某
將指此來深惟一道司臬責重任難凜凜焉思所以稱
厥職公清以為本勤勉以行之此心無愧無忤則庶可

以事神治民矣祇謁之初矢心以告

番禺五賢祠祝文

謹以酒果之奠敢昭告于文忠顏公文正范公詹事王公忠宣洪公忠定趙公世有偉人吾道棟梁惟顏惟范唐宋相望鑿鑿其實炯炯其光百代聞風首俛心降梅溪王公景行前哲凜然清標同一軌轍忠宣之節忠定之烈照映今古俱稱人傑嗟哉晚生不見典型憫俗之頽涕淚交橫祇拜五賢想像芳馨夙興夜寐兢兢奉行

諸廟謝晴文

勾芒司旦土膏既興陵陂之麥鬱乎青青積陰未解霖
雨其零侵畦溢壟溝澮皆盈民以病告有禱于神曾未
徹奠雲開晦明瞳瞳曉日赫然東昇匪神之休孰赫厥
靈巫祝矯舉吏實何稱神降之福以答民誠

自鳴山廟謝晴文

血食溪上惟神孔靈千載一日凜凜猶生水旱有求如
響應聲今茲淫雨巨浸日增害我嘉禾甚于螭螟睠惟

東江歲比不登饑者相望殍者相仍予吏茲土職兼常
平豈不救荒惠止斗升惕然內愧所望秋成芄芃其稼
百室可盈垂成而壞易喜而驚為民告哀遣官代行冀
神之聽痛鑒此情層陰蕩空曉日舒晴多黍多稌如坻
如京吏責寬釋民歌沸騰則神之賜丘山猶輕歸然祠
宇豈無壞傾捐我薄費是經是營豈以為報聊竭此誠
此誠無盡通貫幽明

自鳴山廟祝文

其惟勲盛者報必隆實大者名必赫番江之民王父母
之番江之水王指麾之決旬以前敬禱祠下陰靈頓掃
晴日麗空遐邇耄倪莫不呼舞非所謂實大勲盛者乎
某雖無狀心與王通其禱也固曰當力請于朝增崇封
爵斯言一出金石不渝累日討求申藁已具繕寫一通
告于王前庸致隆報以赫厥名此某之所以踐前言也
惟王神功廣大陰相默佑使水之未盡退者速歸其壑
民之尚沾危者速奠厥居一道之民咸曰聖哉吾王不

其休歟因謝有祈寸衷甚切惟王其鑒之

初建書院告陸象山先生文

先生之精神其在何所耶在金溪之故廬優游而容與
耶在象山之精舍言言而語語耶抑周流乎上下四方
與天地游與四時序耶某將指東江志興正學山之旁
近爰咨爰度得勝境于徐巖離家山而非邈三山環峙
兮高高可仰大溪橫陳兮清可濯殆天造而地設匪人謀
之攸作是可以宅先生之精神振先生之木鐸或曰建

象山之書院當于象山之故址而又焉可改也是求先生于形迹而未知先生之精神無在無不在也先生之道精一匪二揭本心以示人此學問之大致嗣先生之遺響警一世之聾瞶平易切近明白光粹至今讀其遺書人人識我良貴由仁義行與行仁義者昭昭乎易判也集義所生與義襲取者截截乎不亂也宇宙內事即已分內事渾渾乎本一貫也議論一途樸實一途極天下之能言者斯言不可贊也嗚呼先生之學如此先生

之精神如此然則在金溪之故廬者如此在象山之精舍者如此周流乎上下四方者亦如此誰謂徐巖而獨非此耶工役倣興禮宜虔告先生精神淵淵浩浩

祭陸象山先生文

先生之學得諸孟子我之本心光明如此未識本心如雲翳日既識本心元無一物先生立言本末具備不墮一偏萬物無蔽書院肇建躬致一奠可見可聞非聞非見

先師克國公祝文

先師道德難可名狀元氣融融春風盎盎舜何人哉當
仁不讓奮此大勇一何其壯顓蒙小子學焉勉強慕先
師之屢空一言而蔽之曰平平蕩蕩

創東塾告絜齋先生祠堂祝文

洙泗闡教萬世同尊漢唐榛蕪陋儒實繁我朝諸老發
揮微言肆我先公體道之元推以淑人訓語溫溫光明
本有意動而昏昏去明復照耀乾坤四海歸慕絜齋之

門矧伊一家昆弟子孫爰及甥輩罔間藩垣祠宇告成
德容如存肇開東塾晝夜講論某未知學膚淺無根願
與同志唱和麓塤如彼鳳凰千仞高騫如彼滄溟百川
並奔學要如是洞徹心源佩服終身罔極之恩

祭史衛王文

師王之生數闕乎天惟福惟量其大無邊問王之福得
君甚專幹旋元化獨秉大權始終無二凡三十年其間
變故何翅百千蒙疑履危雍容周旋固守矩方隨機規

圓無竭泉流不動石堅偉哉元勛洗日虞淵恭已委政
倚王之賢王雖臥疾寵數蟬聯再世王爵自昔莫先生
榮死哀孫子繇繇福萃一門舉茲以旃問王之量翕受
羣言我所身嘗知王裕然官雖疏逖有言必宣皇都鬱
攸物情喧喧我忠于王飛奏君前亟解機務君臣道全
彗星謫見流言愈傳我忠于王再騰奏篇亟逃天譴室
欲之原茲誠苦口誰謂我妍王量如海百川赴焉不舉
我言察我心田心乎忠愛匪事佞便感王知已實惟勤

峯聞王之薨職守攸牽緘辭寫悲心旌翩翩

祭拙堂致政韓公文

惟天不輕畀人兮壽為九五福之首皓首朱顏婆娑林
下兮信人間之稀有集茲福于厥躬兮又回顧夫我後
後人命懸于天兮孰豫知肯堂與否偉韓公之獨稟于
天兮蓋積善之素厚森堦除之蘭玉兮何弟恭而兄友
歲在癸未兮二子雙綰乎藍綬耿名門之輝光兮譽喧
騰乎萬口咸謂儒家氣味不比北平之有子兮鸞鵲停

峙足以傳諸不朽我未瞻公之典型兮先于長嗣焉定
交體質金玉兮義理薰陶一見傾蓋兮延誨兒曹我仕
大江之東兮又王事之相遭長嗣迎公以來兮兩臉有
似乎蟠桃遂升堂以展敬兮情誼奚翅乎漆膠次嗣詞
學之競爽兮瀉萬斛之波濤羌墮旒之迭和兮暢一翁
之逍遙龍賓兮相邀濁酒兮山肴此樂何極兮知不知
吾常竄竄人謂公才兮少時勇決遇事敢為兮志意彌
烈晚年名堂以拙兮心如石鐵斂鋒鏑于不用兮撓萬

變而不折陋流俗之鍥薄兮遵道德之軌轍寧安已之
分義兮奚顧彼炙手之可熱倚長松以嘯詠兮凜清風
之高潔此吾拙堂之所賦兮昔公一覽而擊節謂知予
心兮勝予自說次嗣通籍兮慶事不絕長入朝路兮出
分風月天子有詔兮峻奉常之班列將整裝而上征兮
胡為乎求醫問藥而中輟嗚呼歲幾兩周兮拙翁言別
每問訊兮憂心惛惛忽訃聞兮使我悲噓有子可託兮
孫枝芽茁死生晝夜兮達人一瞥拙翁何憾兮茲理洞

徹身有時而盡兮光明亘萬古而不滅到此乃知拙翁
之作計兮今而後其計非拙靈乎有知諒我遠而不遑
奔慟寓誠一卮千里對面其歆我詞

祭程提刑文

立身大節出處行藏固守命義其道乃光猗歟程公溫
溫春陽孰識其奧外柔中剛好善如渴汲汲皇皇覩彼
不善真若探湯鳴弦懷玉厥聞孔揚事苟利民勇孰可
當民曰父母遺愛甘棠夙駕屏篁來我鄮鄉不為勢屈

守道之常清湘布政肯遜龔黃政最既聞使節輝煌奈
彼妒賢巧言如簧公心坦坦不動毫芒從此賦歸脫屣
軒裳清斯濯纓志在滄浪我初識公謂我循良未知其
學義理昭章我來東江蕩節是將部有賢僚實公令郎
辟宰番邑井井紀綱公時就養訓之義方公每語我喜
色洋洋吾兒知學溫習靡忘願使此兒志氣日彊公與
我別凡幾星霜終始一心道義是覆捐世俗累留晚節
香聞公抱病我心已傷俄已訃至今我涕滂嗚呼哀哉

誰能知公疾惡剛腸雖老猶壯以禮自防索我大書中
庸名堂爰及諸齋區處精詳將淑生徒正學是倡推此
規模浩不可量胡然一疾失孤鳳凰慨念平生一往拈
蒼病實尼之躬奠未遑姑寫我心千里一觴幸哉有子
世繼芬芳公亦何憾雖死不亡

誌銘

孫君墓誌銘

余友人胡牧之遺余書曰吾學子有孫震者其先人功

甫以嘉定辛未十有一月丁巳卒享年四十有八將以乙酉歲十有二月壬寅葬于俞山之原功甫居天台閭風挹山川秀爽有異質美髭髯意氣恢疎而篤于孝友昆弟六人功甫于次為四親既歿凡室廬田產器物聽伯仲所自取功甫不以介意好買書延良師以教子授孟氏天爵人爵之語疊疊訓誘不勸臨終戒諸子力學家事一不掛口故其子築館所居之西偏扁曰綠猗以盡琢磨之義先志也功甫不得志于時家庭事業大概

若此子其序且銘之余歎世降俗薄較錙銖之利忘同
氣之親遺子以贏金而不淑以詩書何如其知也識度
如孫君而可無述乎君諱九敘功甫字也曾大父皓大
父闐父璿妣張氏娶四明奉川胡氏子男三長即震也
次雱靈女一適四明進士王劭孫男五恢孫愷孫悌孫
怡孫忻孫孫女一銘曰行修于家是亦為政我刻銘詩
後人興敬

伍府君墓誌銘

余求友于四方見有質茂美而志恢張者心甚敬焉竭
來柯山得友曰伍清之挹其貌莊而和聽其言平而實
攷其行鄉閭稱為佳士叩其志沛乎勇決而莫之禦也
嗚呼是余所謂質茂美而志恢張者耶是其門戶當興
而然耶一日清之泣請于余曰不肖孤將以九月甲申
奉先考柩葬于東山之麓惟是德銘未立敬敘先世梗
概敢頓首以請余覽之拱曰積善之家也是宜有後按
伍氏之先本楚人自英烈以存吳著偉節歿為明神大

江以南往往立廟祀之子孫散處吳楚閩越間漢晉迄唐代有可錄攷國朝登科記題名餘五十人在臨汀者獨盛而占籍于衢者猶未著也君諱總字子壽世為西安人曾祖熹醇厚有古人風家雄于財然喜施與貫貸者率折券曰積而能散義也祖佚考機俱以善人稱退然自守與物無競然生理視舊則不復振矣君奮自植立竭力以奉甘旨與人交篤于信義然耿介不苟合門無雜賓尤以教子為急家務靡密躬自任之不以累諸

子聞四方有明師良友亟使就正焉已而清之預鄉書入太學歲率再歸歸必止之又三年補內舍生君遺以書且舉山谷詩但得新年勝舊年即如常在郎罷前曰專而學業孝莫大焉以是清之得一意于學嘉定十有六年清之擢奉常第歸拜膝下教忠之訓訖不離口時雙親在堂綠衣團圞其樂無涯越二年而皇考歿又明年妣遽氏歿積憂熏心號慟成疾六閱月而終寶慶二年四月二十有八日也壽纔五十有二娶王氏子三人

長維寅修職郎新衡州司戶參軍清之也次維新後其叔麟孺維允先卒孫三人源孫還孫聞孫銘曰人誰不死而君有子人誰無子而子令只東山之陽吉人之藏子孫縣縣伍氏其昌

危君墓誌銘

嘉定丙子余官金陵與臨川危君諱和字應祥相好也後十年余守柯山應祥自中都過余與譚名理心若有契不知余識進耶應祥學進耶應祥主上元簿會府人

物林數挾才能爭取上官知面嬉笑胸戈戟應祥深藏
若虛諸公器重之不挾書覓舉舉反先儕輩歲大祿招
糴旁郡走川陸不告勞受輸務寬民不希意取贏攝校
官士循規矩參鞠獄人稱無冤漕檄同官慮囚府亦屬
以事莫知適從垂獲譴應祥奮不顧白漕請代行有識
義之就辟帥幕悉忠長官無巨細必啓告敵人來侵羽
檄交馳制帥挽應祥參畫以書生不知兵辭始終金陵
六七年迄免譏謗簿舍明道先生舊游應祥憫正學湮

蘇大闢祠宇廣養士員西山真公偉是舉也為記其事
改秩宰饒之德興值歲歉先諸邑條賑卹不待部使者
迫之然後從事民賴以活諸所施行皆此類處閨門莊
而不矯睦宗族恩而有義事關風教力持之不變居官
以廉潔稱還里飯不足澹如也取陶靖節語自號閒靜
居士應祥十年間涉歷蓋如此訪我柯山風霜飽矣枝
葉落矣方期晚節共進此道嗟乎胡奪之速應祥登乙
丑進士科歷階至奉議郎自德興丁內艱再調隆興之

南昌未至官而卒實紹定己丑八月丙辰也享年六十
有四曾祖巘祖能父必強贈承事郎母陳氏繼許氏俱
贈孺人娶羅氏封孺人子男三人璫先君三月卒琛瑞
業進士女三人長適鄉貢進士李廷龍次適從事郎常
德府龍陽縣尉趙稅夫次適將仕郎趙必撫孫男四人
孫女一人曾孫女一人始應祥築書堂于臨川東鄉之
蟾塘風景清曠環以脩竹讀書竟日超然忘世平生著
述有集若干卷藏于家應祥既歿葬未得卜一夕見夢

其孤曰書堂即其地也尚何求琛等遂以其年月日奉君之柩窆焉謂余知君琛泣請銘銘曰言依乎是行逃乎毀不亢不媚孰信信已生兮書囊藏兮書堂餘韻琅琅世載其芳

江夫人巢氏墓誌銘

余持節江左志興學校郡博士各思振職而秋浦校官江子遠尤奮發帥先余固多子遠而未知家風之自也一日子遠奉親命持祖妣夫人巢氏言行一編拜且泣

請余銘余覽之藹然有古賢妃淑女風子遠才固高然
玉于成者夫人教也子遠推家庭之教教庠序士士咸
知興起子遠益自勵不使才勝德則夫人之教入之深
矣乃序次大略惟巢氏自尚之仕劉宋嘗守新安繇新
安還建業舟過東匯愛其江山卜居焉遂為南康都昌
人至國朝熙寧間有名谷者仕蜀與東坡兄弟友東坡
謫嶺海谷訪之握手道平生歡世服其高誼曾祖諱自
牧祖諱勉父諱紹椿自號無我居士居士雅以先世風

誼為法自拔流俗一女憐之擇對惟謹知江君諱某端
厚長者歸焉夫人生于紹興乙丑之十月終于紹定辛
卯之七月壽八十有六兩遇恩封太安人將以某年某
月某日葬于縣之新城鄉伏牛山之右麓六男子煜輝
暉炎榮華皆業進士暉丙戌奏名調峽州宜都尉四女
俱嫁為士人妻孫男十人日新九萬萬里又新自新萬
頃萬盈萬全萬齡萬善九萬太學生萬里太學上舍生
丙戌進士及第子遠也夫人相夫子以禮春秋祀事必

潔必誠闔門千指耄稚尊幼醇類靜躁不齊夫人調適其間略無長短憎愛語猶子或謂聚族久生產作業寢廢不若各有歸夫人愀然不樂曰此外物耳我奚較顧爾曹妙年盡力學光啓我門戶奈何以瑣瑣嬰心聞者悚服久之不欲拂衆則聽各以意取人人慰滿遇人有恩意婢妾有過怒不形辭色歲惡食艱雖居約推以食人嘗買二羊備姻禮一夕盜取去有告者盜聞亟伏辜請償夫人曰是為饑所驅奚可責償好言諭遣之盜大

感悟性節儉經時不製一新衣不以一錢供耳目玩至
延師家塾傾囊篋無吝色諸孫滿前聽迺祖講論孟中
庸大學夫人默記要語時時申戒俾勿忘每教為人婦
者孝而婉教為人妻者柔而正出語有典則宿學莫過
也嗟乎是所謂有德者耶克登上壽子孫衆多多而又
賢非德之驗耶余謂子遠家風有自非虛語也是宜銘
銘曰維壽母兮美無度家不裕兮德則裕維此德美流
慶曷已何以占之視其孫子

胡君墓誌銘

君諱誼字正之其先苕霅人五季避地徙丹丘後徙明之奉川曾祖嗇祖仁考宗彝俱不仕妣王氏正之生于紹興己卯歿于紹定壬辰壽七十有四娶陳氏繼任氏先正之三年卒男三明鎮明璧明奎皆習儒女一適進士袁潤孫男二守成守本女一將以癸巳冬十月甲申葬于松林鄉銅山之原明璧持其叔父牧之所敘言行泣請銘余為童子時見學徒負笈從先君子游常百數

正之骨清神靜筆端洒洒無俗氣先君子尤愛之曰修
謹士也自以不與時偶益讀古聖哲書深求旨趣以自
暢適晚歲建聚書樓扁曰觀省自號觀省佚翁且作記
曰青嶂當前翠竿在側展卷與聖賢對語優哉游哉又
述先君子之訓曰修身為本謹行為先觀于斯省于斯
子子孫孫寶之永無忘正之歿半歲一夕見夢明壁汝
其卜吉于冬以葬我亟走江東乞銘且持觀省樓記求
跋于吏部吏部余兄也時謁告省松楸正之何自知之

噫死生如一是真能觀省者耶古人云斃而後已正之
雖亡觀省尚不已耶先君子以絜名齋每曰安貧樂道
是謂潔白不遇而富貴汙莫甚焉正之老于韋布乃能
服膺師訓觀省此心死而不忘是宜銘銘曰癯儒精神
樂哉一貧是為絜齋先生之弟子不辱師門

甘氏夫人墓誌銘

余聞南安邑大夫徐君德夫之賢舊矣嘉熙改元余與
德夫同朝一日袖母夫人行實泣請銘余讀之歎曰嗚

呼非此母不生此子非此子莫顯此母德夫自為士人
已有跋慕前修志對嘉定癸未廷試策詳定官以語觸
時忌繇亞魁降第十辛卯秋都城災詔求直言德夫時
為福建帥司幹官感慨草封事力詆權相謂積陰之極
厥徵為火親黨危之德夫入白夫人夫人曰禍福有命
當言即言獲罪歸幸矣其宰南安也西山真公嘗薦之
德夫以母老辭夫人聞之曰汝受西山知義當就職至
則蠲橫征革蠹弊活羸殍治行卓然為一道冠曾子有

言泣官不敬非孝也有賢母以成孝子之志可嘉也已
夫人姓甘氏曾祖仲賢祖文雨父如松世為豫章豐城
人夫人生而慧淑父母鍾愛以歸同邑故承事郎徐公
琮事尊嫜盡禮相夫子以義雖處約其志樂也睦娣姒
無間言撫前室子如已出妾御有過訓飭而已鄉閭族
婦人人得其歡心德夫分教橫浦大振學政撤齋廬而
一新之夫人戒勿擾故事集而人不知南安歲饑勸分
平糴鄰境翔踴邑纔半直夫人病中猶朝夕問米價損

益以為欣戚愛人恤物天性然也端平改元季夏十八日終于官舍享年九十有二以慈明太后慶壽恩封太孺人三男子長光卿次鹿卿德夫也奉議郎主管官告院季榮卿孫男七人元老南老鼎老端老還老合老申老女三人俱幼諸孤以是年十有一月二十有五曰葬夫人于雲嵐之原噫樂莫樂乎榮其親哀莫哀乎喪其親方閩帥李農卿駿有母年九袞燕同寮之將母者二人于眉壽堂夫人預焉閩人作三母歌以紀其事何其

樂也德夫宰南安纔七閏月惠汝赤子失我壽母邑人
哭之如哭其私親又何哀也哀樂相生而道存焉誰謂
夫人之云亡銘曰家庭之言知有西山匪西山之思思
母之賢

湘潭縣尉趙君墓誌銘

余友湯伯紀端介不妄言持其所狀婦翁趙君言行示
余曰翁篤厚人也儀槩端嚴行事有典則與人言依于
孝悌忠信請子銘其墓余曰趙君能以女妻伯紀鑒裁

高矣余何敢辭君諱俾夫字壽翁曾大考和之贈訓武
郎大考公彥贈武議郎始寓居饒州餘干縣考彥榛妣
張氏夫人君家本北種有直氣不立城府好行義事君
蚤失怙恃與伯氏戶曹掾某益自奮問學日廣戶曹取
太常第不食一日之祿以歿君痛悼良劇奉嫂如母課
猶子以書外祖母年逾八十時時迎養盡歡伯舅病痼
且貧敬共資廩終其身不衰聚族衆多且字且誨死者
葬埋之祀者繼之兩以漕貢試春官寶慶初元賜進士

第調尉弋陽未上改湘潭西尉廉勤靖共束卒以律而
給庸錢以時異時掊取之弊一朝頓革邑有社倉尉實
司斂散率常豐取刻與君泣以公清無秋毫私遇歲歉
出已俸以助惠民劉氏二喪久不能舉捐數萬錢俾克
葬君勇于義皆此類尉且更俄得疾遽卒享年五十有
六端平元年六月七日也喪車之歸闔邑泣送出郭遠
焉而後反十二月甲申葬邑西桐江之原先夫人傅氏
繼徐氏子男二人時晏保義郎臨賀縣尉時昂四女適

姜雋湯謨湯漢洪桂孫男一若潔伯紀之言既信不誣
又受知當世名流干越議新邑庠吏部趙公委君度費
經工學成壯偉為旁邑冠湘潭西尉創置無官舍連帥
余公子之貲未幾牆屋飭備而記其成者實西山真公
也諸君子亦可謂知君矣然余又嘗試以事蓋將指東
江之日發粟賑饑人縣令屬君分行鄉井凡君所斥散
者有實賜無濫予今為余道其事心尤敬焉然則非余
誰宜銘銘曰質厚之人今世匪多死于一尉天也如何

蒙齋集卷十七

欽定四庫全書

蒙齋集卷十八

宋 袁甫 撰

誌銘

承奉郎朱君墓誌銘

交際主義尚矣與其子厚敬其父義也紹定中某持江
左倉憲節五年待賓僚如一家有迎親來者致禮加敬
青陽尉朱冠之名元龍敏而篤學擢入幕聞其父承奉

君老成有氣概不知其就養也弗及見已而欲見則已
歸後聞以疾卒元龍請銘義不得辭謹諾之以志吾過
君諱適之字子正婺之義烏人曾祖宗茂祖邦彥父昌
俱潛德弗仕君幼孤母胡氏俾就師晝夜刻苦委已于
學戰場屋左次不咎有司洎二子預薦書君遂不復作
仕進想每為人道貴孝友終身色養敬謹匪懈姊病而
館于家奉養嫂如兄存哀諸姪而字焉治家肅整以嘻
嘻為戒伏臘裕矣益帥先宗儉獨賑窮乏無靳色歎歲

設糜食餓者發廩平價以利民瘞遺酖飯羸囚苦節樂
施皆此類元龍登進士第青陽及瓜欲迎侍固請乃許
縱覽九華愛此奇觀居無何浩然賦歸元龍秩滿為理
掾東江又以請曰吾聞部使者仁賑荒恤冤汝悉贊而
長獄無濫民不饑父志願畢矣奚事偕往噫奔走聲利
日夜不肯休世俗滔滔皆是子祿養尚倦游肯曳裾侯
門乎儀狀脩偉與人交皆與其善過面斥之愚民為彊
悍屈慨然出力掄解雖召謗不悔孔子稱人之生也直

君實有焉君生于隆興甲申八月乙卯卒于端平甲午
己未其明年十二月丙申葬于繡湖之西原君兩該恩
封承奉郎娶陳氏封安人子男二人長元龍也奉議郎
知處州縉雲縣事次桂發浙漕貢士孫男四人幼成幼
聞幼特幼敏孫女五人曾孫女一人銘曰柏以堅保歲
寒竹以直拂雲端嗟俗迷諂而隨視夫君顏忸怩大于
門義方存我作銘詔後昆

東巖老人鄭君墓誌銘

乾淳間美材出儒風盛士恥獨學謏聞父愛子延碩師
擇直諒友甚已饑渴自儒先凋零斯道湮鬱學者甘心
孤陋世推真師友亦罕焉緬懷乾淳撫几太息一日舊
僚趙克家持鄭君少宏行狀來乞銘余攷師友淵源多
從諸老先生游而定城令許君中應君宗卿錢君文子
則專師也內表正節李侯敬之友也李侯學出東萊呂
成公君涵濡薰染行端方學刻苦前賢格言大訓探微
鉤隱窮晝夜不懈性輕財重義士友至于我館資糧乏

于我助歲大祲發私積貸鄉鄰歸逋如期慨焉焚券遇族嫺之死喪孤遺者周給之有品節而誨其子若弟孳孳無厭數獎善救失親黨畏慕焉迹其行事破藩牆均人我師友漸摩驗矣君諱良朋少宏字也世為婺之東陽人曾祖振祖壽考紹庭皆有潛德考不娶蚤世仲姑為李氏婦正節母也君實自出焉祖母九十餘老疾勤視養喪致哀毀時祀輒嗚咽流涕子女滿前授詩書示嚮方晚課諸孫戒曰我誨爾望爾孝也孝不必榮以祿

在守先志我不辱先矣爾學殖落猶我辱也有味其言
綽乎乾淳遺風矣君生于紹興辛巳二月六日卒于端
平乙未五月十有二日越明年四月丁酉葬于邑東五
里岡之原娶王氏司農卿亶之孫女先君七歲卒今合
葬焉生五男子思睿早歿思義思順思忠思儼俱業進
士而思順以京學生該免舉恩三女文林郎監建康府
大軍倉趙必遞從事郎新監江東轉運使寄納倉陳秀
發宣教郎新差知處州慶元縣喬適孫其壻也孫男六

滋昭與恕怡宜女八壻進士曹仲寬趙與遷宗學生趙
與鑒餘未行余與君無雅素師友皆端人信端也矧克
家請不已乃為之銘曰東陽之東有山鬱蔥東巖老人
于焉從容一室委心齊家離離古稱不朽豈伊顯融非
榮之榮不逢而逢命名東麓相國肅公過者興敬師友
之功

承務郎致仕洪君墓誌銘

端平二年余為柱下史舊友洪季思名夢炎以桃源酒

官入郡幕父年登八十余升堂謁見婆娑燕愉意福壽
未艾是歲九月辛巳以疾卒于正寢明年冬十月甲辰
葬夢炎請銘辭甚哀曰夢炎不幸王事馳驅父病不能
嘗藥沒不能視含死有餘罪余曰父教之忠子遵父訓
道也且余目擊其事有三夏五月禁旅闕子受廟堂命
撫定告于父父曰奮身為國吾何憂教忠一也秋七月
復被高沙撫叛之旨父曰汝全活一城毋辱君命教忠
二也未幾差點檢沿江戰艦覈實荆襄守備子力辭父

曰朝廷謂汝才曾未三月由監當而屬官由屬官而掌
故今邊事繹騷奈何避事教忠三也嗚呼真足以厲臣
子之節矣是宜銘謹按洪氏系出豫章唐末徙嚴之淳
安族大以蕃派居梓桐鄉養村里六世矣君諱璵字叔
瑜曾祖孜祖彥正俱潛德不耀考師騫漳州軍事判官
累贈中散大夫妣邵氏繼胡氏俱贈令人君幼警拔出
語驚人中散公歿事母孝一日母思食魚走溪澣求弗
獲忽雙鱗躍出取以進語子女曰始吾疑王祥臥冰近

誣今信矣兄琰弟璞同入上庠同登庚戌第君詞藝不
後二難戰場屋左次則專意課子夢炎以春秋試南宮
有司攷定首選俄列後名士論惋惜君幸有子成立益
以詩書自娛性剛勁守廉隅辨是與非聞者心惕晚更
和易毀譽不掛口居里閭施藥以療疫平糴以賑饑死
無歸者瘞之值慈明太后錫類恩封京秩平生著述若
千卷藏于家娶方氏以禮相夫子內外斬斬鄉人教女
若婦必舉以為法先君五年卒葬于所居里之朱砂塢

君合葬焉葬之日賓客會者數百人執杖而導從者數百人穉耄之泣送者且千人三男子長夢林季夢珏仲則夢炎也二女甲戌進士故婺州錄事參軍方淳士人吳從龍其壻也孫男女各三人曾孫男一人銘曰事君不忠非孝也雖有離憂志樂也弗力王事滔滔皆是視此教忠寧不愧恥

宜人趙氏壙誌

宜人趙氏諱希怡曾祖諱子英朝議大夫祕閣修撰累

贈金紫光祿大夫祖諱伯淮宣議郎通判黃州累贈中
奉大夫考諱師淵朝奉郎太常丞兼國史院編修官實
錄院檢討官自號訥齋妣呂氏贈安人丞相忠穆公之
孫中原喪亂修撰官四方因家于台之黃巖訥齋當代
端人與先正獻公為友宜人年二十有七歸于我天稟
高潔無宗女習氣魏國夫人不逮事事正獻公孝謹余
小有過差宜人輒愀然不樂嘉定八年余廷對叨第一
宜人箴規益切歷官中外家務一髮不掛懷戮力王事

宜人助也端平元年余以祕書少監召二年遷起居舍人兼攝詞垣吏銓宜人見余有所論駁與時落落每歎息曰歸歟既屬疾語余亦如是十月一日辛巳卒于官舍享年五十有九次年十有一月丁酉葬于慶元府鄞縣陽堂鄉陳嶼之原子男二從將仕郎次篴宜人奉已儉與人周襟度曠然時時諷誦詩書他美甚衆不盡錄錄其夙夜警戒相成若古賢妃貞女者而納諸壙悲夫

馮君振甫墓誌銘

慈湖楊先生發明先聖知及仁守之訓有大功于吾道
誘掖後學許與固多至其稱二馮兄弟振甫國壽咸有
所啓發驗諸躬行果不負先生許可國壽蚤亡振甫晚
益融貫表裏洞然知及之矣進于仁守矣余持節江左
興建象山書院延振甫為堂長四方學子來集振甫朝
夕訓警懇至切到語自肺腑流出羣士信嚮雖負雋拔
敏贍之才者一聞振甫講說大旨卻立拱手曰馮堂長
我師也道本無言言非可傳道振甫學問鑒鑒真實忠

信篤敬毫髮無偽感人悟物蓋超于言辭之表學者未
熟稽古書未更歷事遽親炙慈湖先生之教往往意自
揣摩承襲訛舛振甫于書無所不讀履踐又有深功每
聆誨言不待揣摩神領心會傳先生之道最端的無差
自國壽死余為吾道氣脈憂賴有振甫今又亡矣正學
凋落云胡不悲振甫之亡也實嘉熙改元八月十有九
日享年六十有二其孤將以己亥六月庚申奉君之柩
殯于金川鄉會芳嶼之原泣請銘余不得辭君諱興宗

振甫其字也居慶元之祠溪七世矣曾祖諱有義祖諱
敏功考諱奉先妣李氏振甫亦娶李氏二男子長祖授
次祖詒後國壽三女越士高彌大迪功郎監温州瑞安
縣雙穗買納鹽場袁庸里士伍純仁其壻也銘曰道無
方體先天地生孔聖有訓參前倚衡振甫默識仁守兢
兢百世之下尚欽此銘

縣尉楊君太孺人何氏墓誌銘

吾鄉城南楊氏最盛先正獻公絜齋先生久處其家塾

子弟多秀士服習詩書頡頏場屋聲譽大振子美在羣
從中以才稱雖未嘗從先公遊耳目濡染熟前輩風流
蘊藉攷平生行事不與俗子類尚氣誼重然諾喜賔人
急不矜已功師友漸摩有自來矣君諱璘子美字也世
為慶元府鄞縣人曾祖諱景舒以行義著聞鄉閭檢正
王公庭秀為賦碧鮮亭詩子璧實誌其墓祖諱萃溫溫
儒雅聘三山鄭屯田為塾師攻媿樓宣獻公兄弟俱來
學邦人至今以為美談考諱公亮蚤歲入成均四舉禮

部不售妣朱氏娶何氏諱靜恭大理寺丞涇之孫通議
大夫楷之女今集英殿修撰侍郎炳之女弟也紹定四
年該皇太后慶壽恩封太孺人三男子應霆兩浙轉運
司進士宗卿太學免解進士宗琰蚤亡女四人迪功郎
温州平陽縣主簿諸葛壽朋朝散郎主管建昌軍仙都
觀程士龍儒林郎泰州軍事判官林思孫其壻也次女
許承奉郎魏蒙前天孫男二人起巖習進士業起翔太
學生應霆泣謂某曰先君之歿迂齋樓先生狀其行而

墓碣未立今母氏又歿將以二年十一月丙申奉柩窆于桃源鄉西山合先君之兆敢請銘某謂迂齋發揮幽潛至矣奚用贅然余觀舉世患乏才才其真乏也耶國易治家難理能使一家之中綱紀繩繩內外斬斬斯為實才也已君治家事從容裁制動中節會廢者植仆者興疏者密薄者厚親朋居無廬于我館食不繼于我廩嫁孤女之無歸喪不能舉者斂埋焉急義疏財一無所靳而尤以孝行為本奉母惟謹左右無違飲食必擇所

嗜敬進之祖塋精舍題扁未立時寧宗皇帝以皇孫毓
德潛邸翰墨精妙鄭先生為僚東宮遂為之請寧宗欣
然親灑青山繼德菴五大字以賜累世塋域堅壯周備
生事死葬兩無愧怍開禧初邊陲倣擾縣官以乏興開
入仕之門君慨然曰體國固吾素志授迪功郎調台州
黃巖縣尉尋以恩轉從事郎君治民戢盜俱有方略誅
鋤奸猾興修邑庠捐已財新尉解秋毫不出于民此皆
卓卓可紀觀其處家莅官豈余所謂實才者非耶君年

纔五十有六而卒寔嘉定六年八月戊寅也後二十有五年嘉熙改元十月辛卯太孺人卒享年七十有六太孺人姿敏惠父愛之尤教以孝經論孟詩書左氏傳及內則女誡終身不遺忘性恥華靡被服簡澹相夫子以禮切磋如良友君既歿延師誨子必期成立值庚辰鬱攸之變再營廬舍戒二子無過侈傷吾儉尚友堂圯久未復愀然曰此高曾麗澤地可湮廢乎二子承志葺治重還舊觀嫠居寢久家法嚴整如一日婦道母儀可謂

兩得之矣余既多楊君行事又讀迂齋狀謂崇陵違豫
主毫未立君伏闕上書累數千言使人興敬而太孺人
又有賢行夙夜相成追古遺風是可銘也已銘曰楊氏
先世厚德所萃蓋為子孫留方寸地夫君特起布衣論
事奈何忠言報罷莫遂負此偉竒家道小試內外綱維
人愛且畏推以澤物巖邑一尉琴瑟靜好儷美無二西
山之藏瞻彼蒼蔚勿隳德基詔爾後嗣

林府君周夫人墓誌銘

嘉熙二年春宣教郎提舉行在雜賣務雜買場林君嘉會以書諭予乞銘其考妣之墓謹按府君諱思哲字仲文其先三山人後徙溫又徙處之松陽逮府君八世嘉定三年卜居暨陽之梅山曾祖惟周預三舍選祖擬考中弼俱潛德不耀府君性嗜書不治舉子業擇聖賢格言大訓諷詠服膺飭躬閑家與物無競肫肫然謹厚長者也同里周君溥聞其賢以夫人歸之夫人年纔十七端莊沈靜不安語笑家素貧惟以訓子為急晨起府君

入家塾講授經史夫人夜課之槩獲尤嚴諸子俱業進士嘉會遂擢第奉常冠乙科先是府君語嘉會曰吾年未耄而健忘非久人世者但欲見汝成立慰我志耳尋果以疾卒若前知者寔嘉定十三年八月丙戌也享年六十有四次年十月庚午葬于清潭山之原夫人晚歲益康強兩該恩霈封太安人嘉熙改元嘉會宰婺之東陽改倅通州未上徑躋朝列親黨榮之夫人澹如也蓋其志在厥子植立門戶匪徒慕爵祿耀光寵而已次年

正月戊午卒于中都之寓舍壽八十有二將以四月丁酉與府君合葬焉四男子長嘉謨次嘉會也次嘉謀嘉猷嘉猷蚤世一女適進士周恭先孫男五人登孫鎮孫承孫鉞孫鑑孫女八人曾孫男一人女二人某曩將指江東寔與嘉會同寅因子之賢知嚴父義方之自抑知賢母之教為有助也然則非余誰宜銘銘曰夙夜相成琴瑟靜好蒼天曷不偕老雖不偕老有子承考子兮孫兮光我家道

提刑祕閣程公墓誌銘

嘉熙二年中奉大夫提舉紹興府千秋鴻禧觀程公諱
榆告老于朝天子俞其請進直中祕以寵嘉之鄉之士
大夫用漢元德唐貞曜本朝明道故事號公為安節蓋
公退居山林十有餘年安節之名不忝矣孟子曰聞伯
夷之風者頑夫廉懦夫有立志范文正公記嚴子陵之
祠亦曰先生之風山高水長嗚呼來不知所從去不知
所往而自能橐籥萬物者其風之妙乎公之言行有家

傳行述記載明備而公之子沐又乞銘于余余惟錄其
細沒其大非銘體也蓋公平生大致不為勢利屈超然
獨立風塵之表自嘉定大臣已落落不苟合至鄭丞相
當國尤屹然決無阿附意寧芒鞋野服蹈丘園玩泉石
以終其身然則天子之褒嘉鄉士之推尊聞公之風者
可以廉頑立懦而與山高水長相為無窮矣公字森之
處州松陽縣人曾祖起祖曠考大雅贈宣奉大夫妣葉
氏楊氏俱贈淑人公登紹熙四年進士第歷徽州績溪

縣主簿監建康府北酒庫知信州玉山縣通判慶元府知金州提點廣南西路刑獄既奉祠里居一字不入脩門洎屬疾亦不以死生動毫芒嘉熙二年六月二十有二日卒于正寢享年六十有八娶陳氏參政越國公之女先公二十七年卒繼葉氏既歸之二年亦卒俱贈淑人子男一即沐也文林郎監行在省倉中界門女適浙漕進士葉東新撫州錄事參軍張忱進士陳炳文孫男鑄將仕郎以是歲十一月甲申葬公于縣之移風鄉紫

山名義為國之大閑也廉恥立身之大節也綱常不明利欲橫流撤大閑墮大節他美莫贖故余于公之出處獨表彰其大者至于為邑為州如古循良將指如古膺使力扶風教受知儒先懿行嘉言不可殫述皆自其大者發之而余又知公之植立非但天資乃學力也余每與沐講論經義歸必告乃翁輒欣然領會其意屬余大書其堂曰中庸公益喜憾相得晚戒沐朝夕觀省勿忘然則余之知公與公之自知豈徒素隱行怪後世有述

而已哉余嘗為言滿天地間莫匪中庸人謂公以不仕
為高孰知所得乃在乎此使時見用其不為沮溺明矣
乃系之銘曰嗟其衡兮芳自吐耿離憂兮心獨苦臥故
山兮幾寒暑非避世兮時不用抱中庸兮炯千古子子
孫孫兮事斯語

撫機闢君安人郭氏墓誌銘

余雅聞闢仲山之名未覲面也而狀君之行著乃林君
伯翰伯翰余所畏言足以傳信矣其略曰君諱嶠字仲

山先世居青社五代之季有避地會稽者子孫遂家于
台曾大父軾大父碩俱不仕父靜贈承事郎君生九歲
而孤母夫人王氏擇師訓之嚴必期成立入太學值光
宗龍飛恩免舉登紹熙庚戌進士第授迪功郎臨安府
鹽官縣尉以母憂不赴復尉慶元之慈溪秩滿陞從事
郎調德安府司法參軍終更用薦格改宣教郎知建寧
府建陽縣事既受代會新使者至豪強之不得志者共
為飛語中君被重劾謫三山事既得白許自便復官授

江東安撫司主管機宜文字成期將及以疾終于正寢
寔嘉定十一年二月十三日也年五十有九官終承議
郎娶郭氏封孺人有平齋類藁三十六卷鍾呂集一卷
藏于家君天資莊重酷嗜書雖道塗驅馳牒訴紛委得
休暇即挾策諷誦作詞章不俚不浮吏事精敏所至著
能聲性輕財急義自奉薄而與人周伯翰許可如右郭
孺人既嫠居該紹定辛卯東朝錫慶恩加封安人卒于
嘉熙二年戊戌正月二十有九日享年七十男二人長

曰琪先卒八年矣次曰城習儒業三女皆先卒中壻新
隆興稅官郭掄安人從兄之子也孫男二孫女二尚幼
嘉定卒已葬君臨海縣義城鄉之豐山將以今年十一
月十有三日以安人合葬焉城諗余曰吾母東陽望族
也性婉嫕有賢行先人得盡力官業不以家務累其心
者母氏力也敢請銘余太息曰君所歷官凡三吾熟其
二焉慈溪吾鄉邑也地陋號易治民去思至今吾嘗守
富沙矣建陽俗最獷富豪根據盤互今俛首聽命迺安

小欲自見禍立至又余所目覩也君處難若易游刃有
餘未足為多既謫三山蕭然四壁闕一室曰龜巢又名
小齋曰且休閒嘗賦詠不知身之在異鄉也庶幾篤于
自信夷險一致者矣然則微伯翰猶當銘況可取信乎
銘曰不汲汲于富貴不戚戚于賤貧吾聞其語思見其
人遷謫二年奚愠之云吾王聖明罪實在臣千古此心
昭假明神夫義婦聽是曰彝倫雖死不朽相敬如賓

太孺人卞氏墓誌銘

佛氏之教徧天下儒者陰信其實而陽諱其名余每病之洪範五福壽富康寧攸好德考終命佛氏以福田勸人其所謂福亦不過如是舊同僚張亨之為余言祖母母家饒于財既嫁能節而自裕素康強無疾病好善尚慈儉臨終沐浴更衣脩然而往壽九十有二余曰是乃備洪範之五福無一闕者及究其所以然則得于佛氏之教妙年卻葷不御持誦觀世音號精嚴匪懈一夕感夢履坦途左右顧盼幽閒虛曠布地皆金砂晶光奪目

一人肩蓮華來拱揖分兩枝見畀夢中疑非人間世覺而神爽思清語家人曰此西方淨土我沒其遊此乎念慮專靜精神默通于是驗矣余將指江東亨之主東流簿敏而有守余愛之遂檄入幕後為坑冶屬官亦相與周旋且歌詩為太孺人壽別來三年而亨之以書請銘人生朝露耳惟得道者雖亡而有不亡者存太孺人姓卞氏諱妙覺霅川人同里張公諱思明之室始父母議擇對不肯嫁凡子名閼豪族皆弗願聞張公賢譽欣然

歸之雅不喜紛華不妄言笑澹如也舅姑性嚴毅恪謹婦職奉甘旨惟恐後治家一遵禮度謂婢妾亦人子雖怒不出惡聲機巧鈎距之態豪髮蔑有真佛氏所謂清淨者耶紹定辛卯該慶壽恩封太孺人端平乙未正月十有二日卒于正寢嘉熙三年三月十四日葬于城西雪水鄉開元山之陽一男昌時承務郎二女進士吳浩黃永年其壻也孫男二人長應運登丙戌進士第儒林郎兩浙轉運司物料官即亨之也次應龍習舉子業孫

女一人適吳門進士曹汝賢曾孫男三人女一人俱幼
噫為佛之徒從佛之教易能也得佛之理不泥佛之迹
難能也太孺人有得于佛氏而誨子孫則以儒識超塵
世之表行修閨閫之中余謂偉男子未能過也乃述其
精誠之應感以參其平生之行事而系之以銘曰是夢
非夢金砂非砂其蓮花耶亦非蓮花夫人得之無礙無
遮壽子而躬昌子而家淨土逍遙樂也無涯

曹君能謙壙誌

國朝風節名臣多賢子孫天也曹氏在天聖中任御史知雜諱修古者直道不阿凜凜生氣至今子諱觀皇祐間守封州以捍儂寇死節余與能謙為僚友聞祖風斂衽起慕余屏居山樊能謙束書終日諷誦夜挑燈忘倦論議灑灑信其為名賢後也曹氏家世出建安後遊宦無定止今居安吉長興之和平曾祖諱照洪州分寧丞妣莫氏祖諱驤信州推官累贈中奉大夫妣莫氏繼劉氏俱贈令人考諱待聘通守福州兼宗正丞奉祠終朝

散大夫妣周氏宜人能謙諱逢已生于嘉泰元年十月
癸卯嘉熙二年六月甲寅卒于正寢得年纔三十有八
將以三年十有二月庚申葬于縣之嘉瑞鄉城山沙墩
之原娶趙氏故太常丞師淵之幼女余亡室妹也能謙
性明敏有巧思而根于孝友恥僅以才稱與余處動中
繩墨孜孜于切已之學其賢如此固御史之報抑宗丞
躬行力義方嚴有以倡之也能謙有庶子憫仲氏無後
慨然以奉烝嘗其亡也趙氏方謀命繼而未之決能謙

猶子主嘉定簿名夢龍請余志其壙余感愴良久銘之
曰生而賢嗇長年人何愆有命焉家道綿清名傳世爭
先我後鞭試問天然不然

叔宗禧兵鈴公墓誌

公諱任字信翁世家開封徙鄞曾祖灼左朝議大夫尚
書倉部郎中妣石氏封恭人祖埴登仕郎妣林氏父有
義贈武顯大夫妣劉氏贈宜人公以聯婣袒免宗補承
節郎監處州酒稅尉荆門長林縣監潭州永豐倉荆湖

南路安撫司準備將領就辟本司親兵統轄充樞密院
正將副福建路兵馬都監秩滿因仍者再頗有倦遊意
奉雲臺沖佑祠為處州兵馬鈐轄終厭仕祝釐崇禧觀
凡三載嘉熙三年九月庚辰卒積階至武節大夫享年
八十趙氏宜人先公歿二子南忠訓郎永平監物料官
高業進士女適趙時擇修職郎紹興府戶掾二孫夢得
蚤亡饒孫男等將以四年二月庚申奉柩葬于鄞之翔
鳳鄉青山原合宜人之墓某于公為子行公幼從先正

獻公學以材猷自負而又能以儉約自持居官舉職受
知當世名公馭軍紀律明恩信孚晚歲益簡澹教子切
切不倦南嘗薦名春官葬日薄二子泣請誌歲月噫我
正獻公壽踰八袞公年亦似根諸簡質欲寡易足心小
罔失觀我斯志百世一日

主簿呂君壙誌

君諱夔友字子韶姓呂氏世為齊之歷城人曾祖諱頤
浩中興名宰相贈太師秦國公配饗高宗廟庭謚忠穆

祖諱撫朝散郎直祕閣累贈大中大夫父諱昭亮朝奉大夫知隆慶府妣錢氏封宜人自忠穆扈蹕南渡寓居赤城隆慶又徙會稽子韶以父任入官授迪功郎監衡山銅鉛場未上改調富陽縣主簿該東朝慶壽恩循從事郎嘉熙己亥卒于富陽官舍得年四十有三娶相山王氏善經紀家事子韶賴之男學治將仕郎女未行學治將以庚子三月甲申奉柩祔葬于諸暨縣義安鄉西山之祖塋子韶有美質識趨舍每念先烈如許我乃沒

沒無聞厲志好修期自植立某之亡室視子韶為中表
行為余言子韶弱不好弄長無子弟之過孝友篤于閨
門余察之信然可以遠到矣而僅止此天乎學治泣請
志歲月嘻忠穆鴻勳施及後昆仕途雖屯典型猶存西
山之墳百世清芬

蒙齋集卷十八